

ORDENANZA FISCAL Número . 26

REGULADORA DA TAXA POLA UTILIZACIÓN PRIVATIVA OU POLOS APROVEITAMENTOS ESPECIAIS CONSTITUÍDOS NO VOO, SOLO OU SUBSOLO DAS VÍAS PÚBLICAS MUNICIPAIS, A FAVOR DE EMPRESAS EXPLOTADORAS OU PRESTADORAS DE SERVIZOS DE TELEFONIA MÓBIL

Artigo 1º.- Fundamento e natureza

De acordo co disposto no artigo 106 da Lei 7/1985 do 2 de abril, reguladora das bases de réxime local e, de conformidade cos artigos 2 a 27 e 57 do Texto refundido da Lei reguladora das facendas locais, aprobado por Real decreto lexislativo 2/2004, do 5 de marzo, establécese a taxa pola utilización privativa ou polos aproveitamentos especiais constituídos no voo, solo e subsolo das vías públicas municipais, a favor de empresas explotadoras ou prestadoras de servizos de telefonía móbil que afecten á xeneralidade ou a unha parte importante da veciñanza.

Artigo 2º.- Feito imponible

1.- Constitúe o feito imponible da taxa o gozo da utilización privativa, ou os aproveitamentos especiais constituídos no solo, subsolo ou voo das vías públicas municipais, a favor de empresas ou entidades explotadoras ou prestadoras de servizos de telefonía móbil que afecten á xeneralidade ou a unha parte importante da veciñanza.

2.- O aproveitamento especial do dominio público producírase sempre que para a explotación ou prestación do servizo de telefonía móbil deban utilizarse antenas, instalacións ou redes que materialmente ocupan o solo, subsolo ou voo das vías públicas municipais, con independencia de que sexa titular daquelas.

3.- En particular, comprenderanse entre os servizos referidos á telefonía móbil e outros medios de comunicación, que se presten, total ou parcialmente, a través de redes ou antenas fixas que ocupan o dominio público local.

Artigo 3º.- Suxeitos pasivos

1.- Son suxeitos pasivos as empresas ou entidades explotadoras ou prestadoras de servizos de telefonía móbil que afecten á xeneralidade ou a unha parte importante da veciñanza.

2.- Para os efectos da taxa aquí regulada, teñen a consideración de suxeitos pasivos as empresas ou entidades explotadoras de servizos a que se refire o apartado anterior, tanto se son titulares das correspondentes instalacións ou redes, que transcorran polo dominio público local e que estean instaladas neste e a través das cales se efectúe a explotación ou prestación do servizo de telefonía móbil como se, non sendo titulares das ditas redes, o son de dereitos de uso, acceso ou interconexión a estas.

Artigo 4º.- Responsables

A responsabilidade, solidaria ou subsidiaria, esixírase, no seu caso, ás persoas ou entidades nos termos previstos na Lei xeral tributaria.

Artigo 5º.- Período impositivo e devindicación

1.- O período impositivo coincide co ano natural salvo nos supostos de inicio ou cesamento na utilización ou no aproveitamento especial do dominio público local, necesario para a explotación ou prestación do servizo de telefonía móbil, casos en que procederá aplicar o pro rateo trimestral, conforme ás seguintes regras:

Nos supostos de altas por inicio de actividade, liquidarase a cota correspondente aos trimestres naturais que restan para finalizar o exercicio, incluíndo o trimestre en que ten lugar a alta.

En caso de baixas por cese de actividade, liquidarase a cota que corresponda aos trimestres transcorridos desde o inicio do exercicio, incluíndo aquel en que se orixina o cesamento.

2.- A obriga de pagamento da taxa regulada nesta Ordenanza nace nos momentos seguintes:

Cando se trate de concesións ou autorizacións de novos aproveitamentos, no momento de solicitar a licenza correspondente.

Cando o gozo do aproveitamento especial a que se refire o artigo 2º desta ordenanza non requira licenza ou autorización, desde o momento que se inicie o citado aproveitamento. Para tal efecto, enténdese que comezou o aproveitamento especial cando se inicia a prestación de servizos aos usuarios que o soliciten.

3.- Cando os aproveitamentos especiais do solo, subsolo ou voo das vías públicas se prolongan durante varios exercicios, a devindicación da taxa terá lugar o 1 de xaneiro de cada ano e o período impositivo comprenderá o ano natural.

Artigo 6º.- Cota tributaria

Para determinar a contía da taxa aplicaranse as seguintes fórmulas de cálculo:

a) Base imponible

A base imponible, deducida da estimación do aproveitamento especial do dominio público polo servizo de telefonía móbil calcúlase:

$$BI = (Cmf * Nt) + (NH * Cmm)$$

Sendo:

Cmf = consumo telefónico medio estimado, por unidade urbana, corrixido polo coeficiente atribuído á participación da telefonía móbil. Será o resultado de dividir a facturación por telefonía móbil dirixida á rede fixa nacional entre o número de liñas de telefonía fixa, segundo os datos obtidos no Informe anual da Comisión do Mercado das Telecomunicacións. O seu importe para o exercicio 2009 é de 66,78 euros/ano.

Nt = número de teléfonos fixos instalados no municipio, no ano 2007, que é de 13.448.

NH = 95% do número de habitantes empadroados no municipio. En 2007: 30.109.

Cmm = consumo telefónico medio estimado por teléfono móbil. O importe para o 2009 é de 279,5 euros/ano.

b) Cota básica:

A cota básica global determínase aplicando o 1,4 por cento á base imponible:

$$QB = 1,4\% \text{ s/ BI}$$

$$\text{Cota tributaria/operador} = CE * QB$$

Sendo: CE = coeficiente atribuíble a cada operador, segundo a súa cota de participación no mercado, incluíndo as modalidades pospago e prepago.

c) Imputación por operadores

Para 2009 o valor de CE atribuíble a cada operador é o seguinte (resultante dos datos do ICMT do ano inmediatamente anterior):

Movistar	45%
Vodafone	30,5%
Orange	22,5%
Yoigo	0,9%
Euskatel	0,5%
Resto	0,5%

Para os efectos de determinar o coeficiente CE, os suxeitos pasivos poderán acreditar ante o Concello, que o coeficiente real de participación no conxunto dos ingresos de telefonía móbil no exercicio correspondente é diferente do considerado no cadro anterior. Neste caso, as autoliquidacións trimestrais axustaranse aplicando o coeficiente declarado polo obrigado tributario. En defecto do dato achegado polos suxeitos pasivos, tomaranse os que se deriven do último informe anual que emitira a Comisión do Mercado de Telecomunicacións.

Artigo 7º.- Normas de xestión

- 1.- As empresas explotadoras de servizos de telefonía móbil suxeitos pasivos da taxa deben presentar no Concello, antes do 30 de abril de cada ano, no modelo que se aprobe en desenvolvemento da presente ordenanza, declaración-liquidación correspondente ao exercicio inmediatamente anterior.
- 2.- A cantidade a ingresar, de forma simultánea á prestación da declaración-liquidación, polas ditas empresas, será o resultado de minorar a cota tributaria no importe dos pagamentos á conta realizados polo suxeito pasivo no exercicio a que se refira.
- 3.- No suposto en que os pagamentos á conta realizados excedan da contía da cota da taxa, o importe do exceso compensarase no primeiro pagamento a conta que corresponda efectuar tras a presentación da declaración-liquidación.
- 4.- As empresas explotadoras de servizos de comunicacións móbiles, suxeitos pasivos desta taxa, deben autoliquidar e ingresar no Concello, cada trimestre, nos modelos que se aproben en desenvolvemento desta ordenanza, en concepto de pagamento á conta da taxa, o 25 por cento da cota anual resultante de aplicar o establecido no artigo 6º desta ordenanza.
- 5.- A autoliquidación e ingreso dos pagamentos á conta realizarase nos 20 primeiros días naturais do mes seguinte á finalización de cada trimestre.
- 6.- Aquelas empresas explotadoras de servizos de comunicacións móbiles que iniciasen a actividade, deberán presentar a súa declaración, aplicando os criterios establecidos nesta ordenanza.

Artigo 8º.- Infraccións e sancións tributarias

En todo o relativo a infraccións tributarias e ás súas distintas cualificacións, así como as sancións que estas correspondan en cada caso, aplicarase a Ordenanza fiscal xeral de xestión e recadación e outros ingresos de dereitos públicos locais, e demais disposicións de aplicación.

Disposicións adicionais

As ordenanzas fiscais de exercicios futuros poderán modificar o valor dos parámetros Cmf, Nt, NH e Cmm, se así se acorda.

Se non se modifica a presente ordenanza, continuarán sendo de aplicación os parámetros establecidos para o exercicio 2009.

Disposición transitoria

Aplicarase o contido dos convenios asinados en vigor na data de comezo de aplicación desta Taxa, ata a data do seu vencemento.

Disposición final

A presente ordenanza que aproboise definitivamente polo Pleno do Concello na sesión do día 30 de abril do 2009 e entrará en vigor o día da súa publicación do B.O.P., permanecendo en vigor ata a súa modificación ou derogación expresa.

Publicación texto en B.O.P. nº 124 de 2 de xuño do 2009.